



## KATA PENGANTAR

**PERDANA MENTERI  
MALAYSIA**

Negara di seluruh dunia telah memperkasakan usaha sejak awal 2020 demi memerangi pandemik COVID-19 yang telah menjurus kepada krisis kemanusiaan dan kesihatan global paling mencabar dalam sejarah. Sebilangan besar negara telah melaksanakan langkah pembendungan seperti sekatan rentas sempadan dan kuarantin bagi mengekang penularan yang lebih meluas. Dalam hal ini, Malaysia juga tidak terkecuali dalam melaksanakan pelbagai tindakan bagi melindungi rakyat. Penutupan kebanyakan sektor ekonomi selama hampir dua bulan telah menyebabkan perniagaan dan pekerjaan berada di tahap yang berisiko. Implikasi penularan COVID-19 telah mengganggu operasi perniagaan sekaligus menjejaskan aliran hasil dan pendapatan seterusnya memberi impak kepada kehidupan rakyat.

Kebanyakan kerajaan termasuk Malaysia terus berjuang menyeimbangkan usaha untuk menyelamatkan nyawa serta melindungi kehidupan rakyat dan memelihara ekonomi negara. Faktor luaran termasuk kelembapan perdagangan global dan ketidakstabilan harga minyak mentah juga telah meningkatkan keperluan intervensi dasar fiskal bagi menyokong pemulihan ekonomi. Mendepani ancaman terhadap kesihatan dan ekonomi yang tidak pernah terjadi sebelum ini bukanlah satu tugas yang mudah. Walau bagaimanapun, Kerajaan telah menunjukkan komitmen yang tinggi dengan melaksanakan segera polisi yang dinamik sebagai tindak balas dalam tempoh yang mencabar ini.

Kerajaan sedang memacu negara mengharungi situasi yang mencabar ini dengan mengambil pendekatan yang berfokus kepada strategi 6R iaitu *Resolve* (Ketegasan), *Resilient* (Ketahanan), *Restart* (Memulakan Semula), *Recovery* (Pemulihan), *Revitalise* (Memperkasa) dan *Reform* (Menyusun Semula). Di ambang memasuki fasa kelima, Kerajaan kekal fokus untuk melengkapkan perjalanan negara dari fasa *Restart* (Menjana Semula) ke fasa *Recovery* (Pemulihan) melalui pelaksanaan pakej rangsangan ekonomi dan pelan pemulihan bagi mendorong pertumbuhan negara. Langkah fiskal dan bukan fiskal bernilai RM305 bilion atau sekitar 20% daripada KDNK telah disuntik ke dalam ekonomi melalui inisiatif di bawah pakej rangsangan PRIHATIN, PRIHATIN PKS+, PENJANA dan KITA PRIHATIN.

Dalam jangka masa sederhana, dasar dan inisiatif akan dirumuskan dalam konteks 'kebiasaan baharu' dalam persekitaran pasca-COVID-19. Belanjawan 2021 akan terus fokus kepada aspek melindungi kehidupan dan kebajikan rakyat, memperkasa dan memacu ekonomi, mempergiat pembangunan luar bandar dan wilayah, meningkatkan agenda digitalisasi dan memantapkan

penyampaian perkhidmatan awam. Pandemik COVID-19 juga telah mewujudkan kebiasaan baharu yang membawa perubahan dramatik terhadap cara kita bekerja dan berinteraksi. Oleh itu, adalah penting bagi Kerajaan untuk mewujudkan ekosistem yang boleh membantu pekerja untuk kembali bekerja, dengan menggalakkan penggunaan teknologi yang lebih memudahkan pembelajaran dalam talian dan bekerja dari rumah. Selaras dengan peranan utama yang dipikul oleh Kerajaan, memupuk pemulihan dan memacu pertumbuhan yang baharu akan memerlukan kolaborasi yang lebih besar daripada banyak pihak berkepentingan, yang merupakan pemimpin pelbagai organisasi dari sektor korporat ke institusi. Walaupun bagaimanapun, rakyat Malaysia telah menunjukkan cara yang luar biasa sepanjang tempoh yang mencabar di negara ini. Gerakan seperti #KitaJagaKita telah menyaksikan rakyat Malaysia berganding bahu dengan NGO dan syarikat bagi bersama-sama membantu rakyat Malaysia.

Dalam menghadapi perubahan semasa, adalah sangat penting bagi memastikan sumber fiskal negara digunakan untuk memacu pelaburan dengan tujuan utama untuk melindungi kehidupan rakyat, menyokong perniagaan dan melonjakkan pertumbuhan ekonomi negara. Kerajaan percaya bahawa tindak balas dasar fiskal pada ketika ini adalah tindakan yang tepat kerana telah wujudnya keperluan yang mendesak untuk memastikan inisiatif rangsangan yang besar dan rancangan pemulihan ekonomi dilaksanakan dengan segera. Walaupun defisit belanjawan cenderung untuk meningkat pada tahun 2020, Kerajaan berpandangan bahawa inisiatif PRIHATIN, PRIHATIN PKS+, PENJANA dan KITA PRIHATIN akan dapat memastikan bahawa Malaysia memiliki kemampuan dan kapasiti untuk menyejajarkan pemulihan pasca-COVID. Melangkah ke hadapan, Kerajaan akan terus fokus untuk memelihara disiplin fiskal demi mempertahankan kekuatan sistemik dan kebertanggungjawaban kewangan awam. Kerajaan juga komited untuk meningkatkan reformasi struktur dan institusi, memastikan penyampaian perkhidmatan awam yang berkesan dan tadbir urus yang lebih cekap demi kelangsungan dan ketahanan jangka masa panjang ekonomi Malaysia.

Dalam mengharungi tempoh yang sukar ini, kita mesti mempergiat usaha untuk terus membangun, mengekalkan dan meningkatkan kepercayaan serta keyakinan rakyat demi kebaikan bersama. Sebagai sebuah negara, kita sudah menghadapi pelbagai krisis sebelum ini, dan Alhamdulillah, kita mampu mengatasi kesemua kesukaran dengan jayanya. Tindak balas dasar yang berhemat dan tidak konvensional ditambah lagi dengan kesungguhan rakyat dalam menghadapi cabaran telah membuktikan kemampuan negara ini untuk menjadi lebih kuat. Oleh itu, saya yakin bahawa setiap rakyat Malaysia akan kekal teguh dan bersatu demi mencipta masa depan yang lebih baik dan cerah untuk negara. Insya-Allah.



**TAN SRI HAJI MUHYIDDIN BIN HAJI MOHD YASSIN**  
6 November 2020